

# DIZRA' GUDXUPE' DA BZUAJ SAN PABLO CHEE BI CHEE CRISTO ZAJ ZRE'E CORINTO

---

**Pablo dxuzúaje' chee bi bíchedxu zaj zre'e xezre Corinto**

**1** <sup>1</sup>Neda', Pablo, naca' gubáz chee Jesucristo lawe' da naca na da dxaca lazre' Dios. Tu zren nen bíchedxu Timoteo dxuzúaja' da nigá chee le'e, bi bícha'dau', zrágale chee Dios lu xezre Corinto. Cá'anqueze dxuzúaja' da nigá chee xúgute bi chee Dios zaj zre'e xezre ca' zaj nababa xezr la xu Acaya. <sup>2</sup>Dxenaba' Xradxu Dios, ne Xránadxu Jesucristo gun chawe'e le'e, ne gunne' le'e xel-la dxebeza zri lazre'.

**Da ca' guz' guzaca' Pablo**

<sup>3</sup>Dxue lá'anantu' Dios, Xra Xránadxu Jesucristo, lawe' da naque' Xradxu dxexache lazre' dxi'u, ne Dios dxexúe zrene' dxi'u. <sup>4</sup>Dios dxexúe zrenqueze' dxi'u ca naca xúgute xel-la zi' da dxededxu, chee cá'anqueze dxi'u gaca xexúe zrendxu benne' ca' dxeledé' xel-la zi', na' xue zrendxu le' cáteze da ba nun Dios cheedxu dxi'u. <sup>5</sup>Lawe' da dxededxu xel-la zi' zren ca da gudé Cristo, cá'anqueze ne chee Cristo zua Nu dxexúe zrenqueze dxi'u, Léqueze Dios. <sup>6</sup>Chee le na', che dxedentu' netu' xel-la zi', naca na chee sua Nu xexúe zren le'e, ne chee lale, na' caní gaca guchaga laule lu duté xel-la zren lazre' chee le xel-la zi' ca' da dxededxu dxi'u. <sup>7</sup>Dxuxrén lázrele'entu' le'e, lawe' da nézentu' ca dxedele xel-la zi' tu zren nen netu', cá'anqueze sua Nu xexúe zren le'e tu zren nen netu', Léqueze Dios.

<sup>8</sup>Bi bicha', dxaca lázrentu' nézele ca naca xel-la zi' zren da gudentu' naga nababa Asia. Guca na tu xel-la zi' zrendxa

ca da gaca guchaga launtu', na' québedxa guleza lázrentu' lantu'. <sup>9</sup>Gúquentu' ba zua gagu xelute benne' ca' netu'. Guca cheentu' da nigá chee bzéajni'i na netu' guxrén lázrentu' Dios, ne quegá guxrén lazre' cuínantu'. <sup>10</sup>Dios bselé' netu', na' ne dxuselé' netu' lu da stēbe zren nigá chee xel-la gute, na' dxebeza lázrentu' Le' guseláqueze' netu' <sup>11</sup>che le'e gácalele netu', nábadxu Dios gácaleñe' netu'. Che benne' zan xelenabe' Dios gácaleñe' netu', na' benne' zan xelé'e Dios: Xcalenu', chee da chawe' ca' da gun Dios cheentu'.

### Bizr chee na' Pablo guzrene' chéaje' Corinto

<sup>12</sup>Naca tu da ba neza da nápantu' da zua na lawe' da dxe xichaj lázrdauntu' netu' ba gudantu' lu da lál'azxa, ne du lázrentu', lu xezr la xu nigá, ne ládujla le'e. Dios lu xel-la zri'i lazre' chee' gúcaleñe' netu' chee bentu' caní, ne quebe bentu' na lu xel-la sina cheézquezentu'. <sup>13</sup>Lu da dxuzúajntu' cheele quebe bi de da quebe gaca gulábale, ne chéajni'ile, na' dxaca lazra' chéajni'i xánnele <sup>14</sup>ca ba guxéajni'ile late', chee lu zra xelál' Xránadxu Jesús, gácantu' netu' tu da ba neza chee le'e, ca le'e gácale tu da ba neza cheentu'.

<sup>15</sup>Lawe' da dxuxrén lazra' gaca caní, bechugu lazra' xida' nédxula xedajnná'a le'e chee gaca tu da ba neza chee, na' xedajnná'a le'e chupa lasa, <sup>16</sup>lawe' da bechugu lazra' xedajnná'a le'e gate tea' cha'a xezre ca' zaj nababa Macedonia, na' te na', gate zezá'a lu xezre ca' zaj nababa Macedonia, xedajnná'a le'e xetú. Ca' gaca na, le'e gaca gácalele neda' cha'a xezre ca' zaj nababa Judea. <sup>17</sup>¿Quebe naca' du lazra' gate dxechugu lazra' caní? ¿Dxéquele le'e naca' ca tu benne' chee xezr la xu nigá, na' dxennía': Awe', cabí, gate dxechugu lazra' da guna'? <sup>18</sup>Dios nézquezne' neda', ne Silvano, ne Timoteo, quebe dxentu' le'e: Awe', cabí. <sup>19</sup>Naca na caní lawe' da Jesucristo, Zri'ine Dios, Bénnea' bzénentu' le'e ca naca chee', cabata' gunné': Awe', cabí. Nen Cristo nácaqueze da li xrtizra Dios, <sup>20</sup>lawe' da ne chee Le' dxelaca li xúgute da guchebe lazre' Dios. Chee le na', gate dxue lánanantu' Dios, dxennantu': ¡Ca'an naca na! ne chee Jesucristo. <sup>21</sup>Dios naque' Bénnea' ba nuzé chúchue' netu', ne le'e lu da naca chee Cristo, ne ba guqué'e dxi'u, <sup>22</sup>ne ba nuzé' cheedxu tu da dxulé'e na nácadxu bi chee Le', lawe' da ba nuzé' Be' Lál'azxa lu xichaj lázrdaudxu, da dxunna bea na sidxu da naca chee'.

<sup>23</sup>Che quebe ne xida' Corinto ca bechugu lazra', neze Dios naca na chee gaca' zren lazre' nen le'e, ne che quebe naca caní, dxenaba' Dios xeque'e xel-la nabán chia'. <sup>24</sup>Quebe naca na lawe' da dxaca lázrentu' nna bé'entu' le'e da dxal-la' cheájlele, lawe' da ba ze cháchale lu da dxéajlele. Dxaca lázrentu' bédxale lu da naca chee Cristo.

**2** <sup>1</sup>Chee le na' bechugu lazra' quebe xida' xedajnná'a le'e lu da baxache'. <sup>2</sup>Che neda' guzúa' le'e lu da baxache', ¿núzraqueze guzúa neda' lu xel-la dxebé? Tuze le'e, benne' ca' ba bzua' lu da baxache'. <sup>3</sup>Chee le na' bzua' chee ca da bēna' lawe' da quebe guca lazra' xida' chee guzúale neda' lu da baxache', le'e na' dxal-la' guzúale neda' lu xel-la dxebé. Bxren lazra' che neda' zua' lu xel-la dxebé, cá'anqueze le'e súale lu xel-la dxebé. <sup>4</sup>Gate bzua' chee da na' guzúle'eda' gunne xue, ne guzúa' lu da zi' da xa', ne cá'anqueze gudxézrele'eqe'za', san quebe bzua' da na' chee guzúa' le'e lu da baxache', san chee nézele nazrí'ile'eda' le'e.

### Ca dxal-la' xulunite lawe' chee bēne' be'ne' da calēla

<sup>5</sup>Che nu benne' ba bzue' neda' lu da baxache', quegá chia' néda'ze be'ne' na, san cá'anqueze waca nnadxu, bzue' xúgutele lu da baxache'. Dxennía': Waca nnadxu, chee quebe gácateca' snia. <sup>6</sup>Ca xel-la zi' da bdele bēne' gate na' bzragale, ba nácale'eqe'ze da na'. <sup>7</sup>Ca' naca na, na'a dxal-la' gunitite laule chee bēne', ne xue zrenle le', chee quebe gunitie' xel-la dxebeza lazre' chee' ne chee da baxache' zren da dxedé'. <sup>8</sup>Chee le na' dxata' xueda' le'e gulé'ele le' xecha lasa ca nazrí'ile'ele le'. <sup>9</sup>Bzua' nédxula chee ca naca da nigá chee gulé'ele lawe' che nácale wezúe dizra' lu xúgute da dxaca. <sup>10</sup>Na'a, nu benne' dxunite laule chee', cá'anqueze neda' dxunite lawa' chee'. Ca da bnite lawa' neda', che naca na tu da dxal-la' gunitite lawa', ba bnite lawa' na ne chee le'e lau Cristo <sup>11</sup>chee quebe seque' Satanás nna be'e na dxi'u, na' ba nézquezdxu ca da dxun na.

### Pablo dxezé' gunne xue lu xezre Troas

<sup>12</sup>Gate bzrina' xezre Troas chee guzenda' bēneache dizra' chawe' chee Cristo, gutá'le'e lataj chia' guna' zrin chee Xránadxu. <sup>13</sup>Guzúale'a gunne xue lawe' da quebe bezrelda' bi bíchedxu Tito ga na'. Chee le na' bzea' dizra' benne' ca' zaj zre'le na', na' guxá'a xezr la xu Macedonia.

### Dxezrué'edxu ne chee Cristo

<sup>14</sup>Xcalén Dios, Bénnea' dxeché'tequeze' dxi'u lu neza guxú'u Jesucristo lu da bzrué'ene', ne dxulé'e lawe' ne cheedxu dxi'u dizra' chee' ca tu da dxelá zixre da dxezriluj gáteteze na.

<sup>15</sup>Dxi'u nácadxu ca da dxelá zixre da dxuzúa Cristo lau Dios, ne dxezriluj na ládujla benne' ca' xeledé', ne ládujla benne' ca' xelebía xi'e. <sup>16</sup>Lau benne' ca' xelebía xi'e da dxelá nigá naca na ca tu da dxute bénneache, san lau benne' ca' xeledé naca na tu da dxunezruj na bénneache xel-la nabán. ¿Nu benne' naca chee' gaque' caní? <sup>17</sup>Netu' quebe dxedantu' dxútentu' dizra' chee Dios, ne quebe dxuchantu' na ca dxelún benne' zante. Lawe' da dxen Dios, dxuchálajntu' du lázrentu', ca benne' nase-la Dios, ne ca wen zrin chee Cristo.

### Dizra' chee xel-la wezría cube

**3** <sup>1</sup>Gate dxennantu' da nigá, ¿dxéquele dxezú launtu' xecha lasa dxennentu' chawe' da naca cheézquezentu'? ¿Dxun na ba xen gulé'entu' le'e tu xiche da dxulé'e na nácantu' xrlátaje, u nábantú' chee tu xiche caní, ca dxelún bal-la benne'? <sup>2</sup>¿Cabí! Lawe' da nácaquezle le'e ca tu xiche da dxulé'e na nácantu' xrlátaje, da naxúaj na lu xichaj lázrdauntu', na' xúgute bénneache gaca xelexúnbe'e na, ne xululabe' na. <sup>3</sup>Le'e nácale ca tu xiche da nuzúaj Cristo, ne da dxulé'e launtu' netu'. Nácale ca tu da naxúaj na da quebe naca na tu lu xiche, san ne chee Be' Lá'azxa chee Dios ban, tu da quebe naxúaj na lu blaga xiaj, san lu lázrdaudxu.

<sup>4</sup>Ne chee Cristo dxuxrén lázrentu' Dios, <sup>5</sup>quegá chee bi gaca guntu' da naca cheézquezentu', san, ca naca da gaca guntu' naca na chee Dios. <sup>6</sup>Le' ba nunne' netu' guntu' zrin chee' ne chee tu xel-la wezría cube da quebe naca na ne chee tu da naxúaj na, san da naca na ne chee Be' Lá'azxa chee'. Da nadxixruj bea na da naxúaj na dxuzría xi na dxi'u, san Be' Lá'azxa na' dxunna dxi'u xel-la nabán.

<sup>7</sup>Da bdxixruj be'e Moisés na' bxuaj na le'e xiaj blaga', ne bla' nen tu da bsení'le'e, na' québedxa belezúe benne' Israel ca' xelené'e lau Moisés, lawe' da gúcatite legala le'e dxu'a lawe', na' xel-la naxaní' na' bexul-la na chawe lazre'. Che lu xel-la naxaní' zren bla' da nadxixruj bea na, da dxuzría xi na dxi'u, <sup>8</sup>da zrénle'edxa naca xel-la naxaní' chee dizra' chawe'

na' da nusá Be' Lá'azxa cheedxu. <sup>9</sup>Che da nadxixruj bea na da dxuzría xi na dxi'u guca na tu da xabáa zrentę, na' tu da xabáa zrénlę'edxa naca dizra' chawe' na' da dxucá'ana na dxi'u xrlátaje lau Dios. <sup>10</sup>Lácala che da nadxixruj bea na nédxula guca na tu da xabáa, na'a quebe bi naca xabáa cheę na lau dizra' chawe' nigá da naca na tu da xabáa zrénlę'edxa. <sup>11</sup>Che guca tu da xabáa cheę da na' guzí bea na tu chí'idauze, napa na tu da xabáa zrénlę'edxa da na' si bea na chadía chacanna.

<sup>12</sup>Lawe' da dxuxrén lázrentu' naca na caní, du lázrentu' dxuchálajntu' dizra' chawe' na'. <sup>13</sup>Quebe dxuntu' ca ben Moisés, bgacu lawe' tu ladxe' cheę quebe xeledé'e benne' Israel ca' xexul-la xel-la naxaní' na' da quebe guzí bea na. <sup>14</sup>Benne' Israel ca' quebe guléajni'ine'. Ne na'a zra, gate dxululabe' xel-la wezría gula na', ladxe' ná'queze quebe dxue na le' lataj xeléajni'ine', lawe' da quebe ne xedúa na, na' gaca xedúa na tuze ne cheę Cristo. <sup>15</sup>Na'a zra, gate dxululabe' dizra' cheę Moisés, zua ca tu ladxe' da dxucache na xichaj lázrdawe'. <sup>16</sup>Gate tu benne' xexaque' cheę Xránadxu, xedúa ladxe' na' lu xichaj lázrdawe', <sup>17</sup>lawe' da naca Xránadxu Be' na', na' naga zua Be' cheę Xránadxu, na' de xel-la weselá lu na' da nadxixruj bea na cheę Moisés na'. <sup>18</sup>Cheę lę na' xúgutedxu dxi'u, lawe' da quebe da' laudxu tu ladxe', nácadxu ca tu wana' da dxulé'e na da xabáa cheę Xránadxu, na' dxí'unqueze, tu tu lasa gate dxelé'edxu da xabáa cheę dxexácadxadxu ca naca Cristo, lawe' da tu tu lasa na' nápadxadxu da xabáa cheę. Da nigá dxun Be' cheę Xránadxu, na dxuché'ę dxi'u lu xichaj lázrdaudxu.

**4** <sup>1</sup>Ca' naca na, cabata' dxate ni'a nantu' lawe' da lu xel-la dxexache lazre' cheę, Dios ba nusebague' netu' zrin nigá cheę Cristo da dxuntu'. <sup>2</sup>Ba nuzúantu' chalá'ala da dxelún bénneache bagácheze, ne da dxedué'entu' ca zaj naca na. Quebe bi dxuntu' da węn lazre', ne quebe dxuchantu' dizra' cheę Dios, san dxennentu' tuze da li, na' caní dxuzúa cuínantu' lu na' xichaj lázrdau xúgute Bénneache lau Dios. <sup>3</sup>Che dizra' chawe' da dxuzénentu' bénneache ne nagache na, naca na caní tuze lau benne' ca' xelebía xi'e. <sup>4</sup>Lawe' da quebe dxeléajlę'ę cheę Cristo, na' da xriwę, da na' naca na dios cheę xęzr la xu nigá ba nun chul-la na xichaj lázrdawe' cheę quebe xeledé'eng' xel-la naxaní' cheę dizra' chawe' cheę xabáa cheę Cristo, Bénnea' naque' lu'a lesaca Dios. <sup>5</sup>Quebe dxuzénentu' bénneache ca naca cheęzquezentu', san ca

naca chee Jesucristo. Dxennantu' naque' Xránadxu, na' ca naca cheentu' dxennantu' nácantu' wen zrin cheele lawe' da nazrí'intu' Jesús. <sup>6</sup>Dios ná'queze, Bénnea' gunná be'e guxaní' xi' na' lu da chul-la, naque' Benne' ba bene' guxaní' xi' chee' lu xichaj lázrdaudxu, chee gaca gúnbeadxu da xabáa chee Dios da dxácatite legala na dxu'a lau Jesucristo.

**Dxundxu xúgute ne chee xel-la dxeajlí lazre' cheedxu**

<sup>7</sup>Da xabáa nigá nápantu' lu bela' dxen cheentu', da naca na ca tu xesu' xu, chee gaca bea za xel-la waca zren nigá lu na' Dios, ne quegá cheézquezentu'. <sup>8</sup>Chee le na':

Láqueze zúantu' lu da stébele'e, quebe dxezentu' gunne xue. Láqueze dxezentu' gunne xue, tu dxebeza lázrezquezentu' gácale Dios netu'.

<sup>9</sup>Láqueze zaj nau zi' xuzre' netu', quebe dxusán Dios netu'.

Láqueze dxeline' netu' xu, quebe dxebía xintu'.

<sup>10</sup>Gáteteze dxéajntu' naca tuze bela' dxen cheentu' nen xel-la gute chee Jesús chee gulé'e lau lu bela' dxen cheentu' xel-la nabán chee Jesús. <sup>11</sup>Dxácaté naca bantu' zúantu' chee gátentu' xúgute zra ne chee Jesús, chee gulé'e lau xel-la nabán chee Jesús lu bela' dxen cheentu' da gate. <sup>12</sup>Ca' naca na, lácala tu zúazquezentu' lu da stébe chee xel-la gute da nigá, dxun na sua tu xel-la nabán cube cheele.

<sup>13</sup>Naxúaj lu dizra' lá'azxa da dxenná na: Guxéajle'a, na' chee le na' bchálaja', na' cá'anqueze netu', lu xel-la dxeajlí lazre' caníqueze, dxéajle'entu', ne dxuchálajntu', <sup>14</sup>lawe' da nézentu' Dios, Bénnea' bsebane' Xránadxu Jesús ládujla benne' gate, cá'anqueze gusebane' dxi'u tu zren nen Jesús, na' tu zren nen le'e, xeché'e dxi'u lau Le'. <sup>15</sup>Xúgute da nigá guzaca zintu' chee gaca tu da ba neza cheele, chee gaca na, gate xezezí' benne' zante xel-la xrlátaje chee Dios, cá'anqueze benne' zante xelé'e Le': Xcalenu', chee gaca ba chee Dios.

<sup>16</sup>Chee le na', cabata' dxate ni'a nadxu. Láqueze dxexru bela' dxen cheedxu, Dios dxuxucube' be' nácaquezdxu tu zra tu zra. <sup>17</sup>Da dxezácadxu lu xezr la xu nigá naca na tu da dauze, da teze chee na, na' nusá na cheedxu tu xabáa chadía chacanna da szrente, ne da cháwedxa. <sup>18</sup>Quebe nná'adxu ca da dxelé'edxu, san nná'adxu da quebe nalá', lawe' da quebe dxezezí' bea da ca' dxelé'edxu, san da ca' quebe dxelé'edxu dxezezí' bea na chadía chacanna.

**5** <sup>1</sup>Bela' dxen cheedxu naca na ca tu xu'u lizre be' nácaquezdxu. Bela' dxen cheedxu naca na ca tu xu'u da quebe si bea na, na' gate gátedxu Dios ba nucueze' cheedxu xabáa tu xu'u da zea jlí canna, da nun Diósqueze, ne quegá bénneache. <sup>2</sup>Da li dxácatę naca bandxu lu bela' dxen nigá dxebezre we'dxu lawe' da dxaca lázredxu cheajchú'udxu bela' dxen cube na' da gunna Dios dxi'u xabáa. <sup>3</sup>Quebe xegá'ana cá'aze be' nácaquezdxu xabáa. Cheajchú'u na bela' dxen cube na'. <sup>4</sup>Dxácatę ne naca bandxu lu xu'u nigá da naca na bela' dxen cheedxu, dxebezre we'dxu, ne dxededxu xel-la zi'. Quebe nácaze na lawe' da dxaca lázredxu gusandxu bela' dxen gula cheedxu nigá. Dxaca lázredxu cheajchú'udxu bela' dxen cube, na' ca'an gaca xenite bela' dxen cheedxu da dxal-la' gate, na' la' bela' dxen cube cheedxu da gaca ban na chadía chacanna. <sup>5</sup>Bénnea' ba nune' dxi'u cheę gaca cheedxu caní naque' Dios, Bénnea' ba nunne' dxi'u Be' Lá'azxa ca tu da dxunna bea na dxal-la' sidxu tu bela' dxen cube xabáa.

<sup>6</sup>Ca' naca na, dxuxrén lázretequezdxu Dios. Ba nezdxu dxácatę naca bandxu lu bela' dxen nigá zúadxu zítu'la naga zua lízredxu, da naca na, quebe zúaledxu Xránadxu, <sup>7</sup>na' dxedadxu ne cheę xel-la dxeajlí lazre' cheedxu, quegá ne cheę da dxel'édxu. <sup>8</sup>Dxuxrén lázredxu Dios, ne dxaca lázredxadxu gusandxu xel-la nabán cheedxu lu bela' dxen nigá cheę chéajdxu cheajsúaledxu Xránadxu. <sup>9</sup>Cheę le na' dxundxu ba xuzre gúntequezdxu da xezaca ba lazre' Xránadxu, che nagá'anadxu lu bela' dxen cheedxu nigá, u che cheajchú'udxu bela' dxen cube, da zua na xabáa, <sup>10</sup>lawe' da xúgutedxu dxun na ba xen xezrindxu lau Cristo cheę guchi'e ca da nundxu tu tudxu, cheę si' lu nadxu ca da xáladxu, cáteze naca da xrlátaje, u da calęla da ba bendxu gate ne zúadxu lu bela' dxen cheedxu nigá.

### Dizra' da dxexún dxi'u tuze nen Dios

<sup>11</sup>Cheę le na', lawe' da núnbeantu' ca dxal-la' zrédexu Xránadxu, dxuntu' ba xuzre guntu' xelexá bénneache. Dios ba nézene' da nácantu', na' dxebeza lazra' cá'anqueze le'e nézele na. <sup>12</sup>Quegá dxennentu' xrlátaje cheézquezentu', san dxúnnantu' le'e lataj gápale netu' ba lá'ana, cheę gaca xechébele cheę benne' ca' dxulucá'ana szren cuine' ca naca da zaj naque' cúzreze, ne quegá ca naca da zaj naque' lu xichaj

lázrdawe'. <sup>13</sup>Che dxeleque bénneache nadá xichaj lázrdauntu' naca na chee guntu' zrin chee Dios, na' che quebe nadá xichaj lázrdauntu' naca na chee gaca tu da ba neza chee le'e.

<sup>14</sup>Xel-la zri'i lazre' chee Cristo dxusebaga na netu' lawe' da nézentu' che tu benne' gutie' waláz chee xúgute bénneache, na' ba gulate xúgute'. <sup>15</sup>Cristo gutie' waláz chee xúgute bénneache, chee benne' ca' zaj naca banē' québedxa xelaca banē' cheézqueze', san chee Le', Bénnea' gutie', ne bebane' waláz chee benne' ca'. <sup>16</sup>Chee le na', québedxa nna'ntu' ca naca da nácaqueze tu benne' lu xezr la xu nigá, na' láqueze nédxula gunna'ntu' Cristo cáteze gúcaqueze' lu xezr la xu nigá, na'a québedxa nna'ntu' Le' caní. <sup>17</sup>Ca' naca, che tu benne' naque' tuze nen Cristo, naque' tu benne' cube. Da gula ca' chee benne' nigá ba guledé chee na, na' xúgute na zaj naca na cube.

<sup>18</sup>Xúgute da caní dxun Dios, Bénnea' bexunē' dxi'u tuze nen Léqueze' ne chee Cristo, na' bsebage' dxi'u guzendxu bénneache ca gaca xelexaque' tuze nen Dios. <sup>19</sup>Gate gute Cristo, Dios guzúalequeze' Le', ne bexunē' bénneache chee xezr la xu nigá tuze nen Le', ne quebe gunné'e ca zaj naca dul-la zaj nabaga bénneache ca', na' bsebage' dxi'u guzendxu bénneache dizra' da dxexún dxi'u tuze nen Dios. <sup>20</sup>Ca' naca na, nácantu' gubáz chee Dios ne chee Cristo, na' naca na cáteze Díósqueze dxata' xuene' le'e lu dxúa'antu', na' dxata' xuentu' le'e lu La Cristo, le xexaca tuze nen Dios. <sup>21</sup>Cristo netú dul-la ca bene', san ne cheedxu dxi'u, Dios bdeē' Le' chee gutie' le'e xaga béguaj ca tu benne' dul-la, chee xexácadxu benne' xrlátaje lau Dios ne chee da ben Cristo.

**6** <sup>1</sup>Ca' naca na, ca wen zrin tu zren nen Dios dxata' xuentu' le'e chee quebe guzúale chalá'ala xel-la zri'i lazre' chee Dios, <sup>2</sup>lawe' da lu dizra' lá'azxa dxenné':

Tu zra dxezaca ba lazra' benda' chiu',  
na' lu zra chee xel-la weselá gúcalēna' lue'.

Na'a naca na zra dxezaca ba lazre' xenne' chee le, ne guselé' le'e.

<sup>3</sup>Quebe bi dxuntu' da gun na quebe xeléajle bénneache chee Cristo, chee quebe nu nne calēla chee zrin dxuntu'. <sup>4</sup>Ca naca xúgute da dxuntu', dxaca lázrentu' gulé'entu' bénneache nácantu' wen zrin chee Dios,

ne chee xel-la dxebeza zren lazre' cheentu' gate dxuchaga launtu' da dxezácantu',



ne da dxexáxrjentu', ne da zaj naca stēbe cheentu',  
 5 ca buluzálaje' netu', ne gulegu'e netu' lizre xia.  
 Guledábage' netu' san bēnle'entu' zrin.  
 Zane' lasa quebe gúsentu', ne quebe bi gudáguntu'.

6 Cá'anqueze blé'entu' da nácantu'  
 ne chee tu xel-la nabán li lazre' cheentu',  
 ne ne chee da li da núnbeantu',  
 ne ne chee xel-la zren lazre' cheentu',  
 ne xel-la zri'i lazre' cheentu',  
 ne ne chee Be' Lá'azxa, Bēnea' zúalēne' netu',  
 ne ne chee xel-la nazrí'i cheentu' da naca na du lazre',  
 7 ne ne chee dizra' li da dxuzénentu' bēneache,  
 ne ne chee xel-la waca chee Dios da zúalē na netu'.

Bchínentu' da zaj naca ca xia chee wedil-la chee da xrlátaje  
 chee gudíl-lantu', ne chee gudentu' chalá'ala da zaj naca ca xia  
 chee wedil-la chee benne' ca' dxeledábage' netu'.

8 Zua gate dxelape' netu' ba lá'ana',  
 ne zua gate dxuluzúe' netu' chalá'ala.  
 Zua gate dxelenné' cheentu' da xrlátaje,  
 ne zua gate dxelenné' cheentu' da calela.  
 Zua gate dxelenné' nácantu' wēn lazre',  
 ne zua gate dxelenné' dxennentu' da li.

9 Zua gate quebe nu dxuzé naga netu',  
 ne zua gate dxuluzé naga xánnie' netu'.  
 Zua gate zúantu' lu da stēbe chee xel-la gute, san ne naca  
 bantu'.  
 Zua gate dxuludé' netu' xel-la zi', san quebe ne xelutie'  
 netu'.

10 Láqueze zúantu' lu da baxache', zúatequezentu' lu xel-la  
 dxebé.  
 Lácala nácantu' benne' xache', ba nuntu' benne' zan benne'  
 gunní'a.

Láqueze quebe bi núantu', xúgute nápantu'.

11 Bi bíchentu', benne' Corinto, ba bchálajntu' du  
 lázrentu'. Ba blé'entu' le'e ca nazrí'i lázrentu' le'e. 12 Tu  
 zúazqueze xel-la zri'i lazre' cheentu', na' le'e na' quebe  
 nazrí'ile netu' du lázrele. 13 Dxata' xueda' le'e ca dxun tu  
 benne' dxata' xuene' bi cheéqueze' chee gulé'ele neda' du  
 lázrele xel-la nazrí'i da zua na lu xichaj lázrdaule cáteze  
 bēna' neda'.

### Nácadxu xudau' chee Dios ban

<sup>14</sup>Quebe gunle tuze nen benne' quebe dxeléajle'e chee Cristo, da gaca na ca chacué' bezre gu'una, be quebe zaj nadíl-leba'.

¿Ajazra gun da xrlátaje gaca na tuze nen da calela?

¿Ajazra gun xel-la naxaní' gaca na tuze nen da chul-la?

<sup>15</sup>¿Ajazra gun Cristo gaque' tuze nen Satanás?

¿Ajazra gun benne' dxéajle'e chee Cristo gaque' tuze nen benne'

quebe dxéajle'e chee'?

<sup>16</sup>¿Ajazra gun xudau' chee Dios gaca na tuze nen bedáu' xiaj xaga?

Lé'eeze nácale xudau' chee Dios ban cáteze gunná

Diósqueze:

Súalena' le', ne tálena' benne' ca'.

Gaca' Dios chee benne' ca', na' le' xelaque' benne' xezre chia'.

<sup>17</sup>Chee le na', cá'aqueze gunné':

Le xedxúaj ládujla benne' ca', ne le cuasa na', dxenná Xránadxu.

Quebe gutale da sban.

Nadxa si' lu na'a le'e <sup>18</sup>ne gaca' Xrale le'e,

na' le'e gácale zri'ina' bi biu, ne zri'ina' bi nu'ula.

Caní dxenná Xránadxu, Bénnea' nape' duté xel-la waca.

**7** <sup>1</sup>Ca' naca na, bi bícha'dau' nazri'ite lazra', da caní zaj naca na da guchebe lazre' Dios cheedxu. Chee le na' dxal-la' guxúe xanne' cuínadxu chee quebe güedxu lataj netú da sban gudxén na dxi'u lu bela' dxen cheedxu, ne lu be' nácaquezdxu, na' lawe' da dxezrébedxu Dios dxal-la' guzúa cuínadxu lu na' Dios duté ca nácadxu.

### Ca belexebí'i lazre' benne' Corinto

<sup>2</sup>Le si' lu na'le netu'. Quebe bi da calela ne guntu' chee nu benne' ládujla le'e, ne quebe nu ne guchántu', ne quebe nu ne si xentu'. <sup>3</sup>Quebe dxennía' da nigá chee gusebaga' le'e zria, san naca na ca ba gucha' le'e nédxula, le'e zúale lu lázrdawa' che gaca bana', u che gatia' tu zrente nen le'e. <sup>4</sup>Du lazra' dxuchálajlena' le'e, ne zua' lu da ba neza ne chee le'e. Lu xúgute da dxezácantu' zua da dxexúe zrénle'e neda', na' dxebéle'eda'.

<sup>5</sup>Da li, gate bzrintu' naga nababa Macedonia, quebe bezí' lázrentu'. Guzántu' lu da stebe gáteteze, lawe' da gáteteze gudentu' guledábaga bénneache netu', na' lu lázrdauntu' bezrébentu'. <sup>6</sup>Nadxa Dios, Bénnea' dxexúe zrene' benne' zaj nate ni'a ne'e, bexúe zrene' netu' ne chee Tito lawe' da bezrinbe' naga zúantu', <sup>7</sup>ne quegá tuze lawe' da bla'be', san cá'anqueze lawe' da bexúe zrenle lebe'. Gúzrebe' netu' ca dxezá lázrele lé'ele netu', ne bzenbe' netu' ca lu da baxache' zúale, ne ca gunne xue dxezele neda', na' chee le na' gubéle'edxeda'.

<sup>8</sup>Láqueze da bzuaja' chee le bzua na le'e lu da baxache', quebe dxebezre lazra' chee da na'. Láqueze gudxezre lazra' nédxula gate guque be'eda' bzua na le'e lu da baxache' tu chí'idau', <sup>9</sup>na'a dxebeda', quegá lawe' da guzúale lu da baxache', san lawe' da ben da baxache' na' bexíaje lázrele. Le'e bchaga laule da baxache' na' ca da bezaca ba lazre' Dios, na' da bzuaja' chee le quebe bi da calela ben na chee le. <sup>10</sup>Da baxache' da dxuchaga laudxu ca da dxezaca ba lazre' Dios dxun na dxexebí'i lázredxu chee ladxu, na' quebe dxal-la' cuezre lázredxu chee na. Che xegá'anadxu lu da baxache' ca dxelún bénneache chee xezr la xu nigá, na' tu chí'ize gátedxu. <sup>11</sup>Le'e bchaga laule da baxache' da guca na chee le ne chee da bzuaja', ne benle ca da dxezaca ba lazre' Dios, na' le nna'xque na'a:

Bzua na le'e gunne xue ca naca da guca,  
ne ben na ble'ele ca da benle.

Bcha'a na le'e, ne bchebe na le'e.

Nadxa guzé lázrele lé'ele neda',

ne guzúale gudele xel-la zi' bénnea' ben da calela na'.

Ca naca xúgute da nigá ble'ele quebe nabágale zria chee dul-la nigá. <sup>12</sup>Ca' naca na, gate bzuaja' chee le da na', quebe guca na lawe' da gudxe'a gunne xue chee bénnea' bene' da calela na', ne quegá lawe' da gudxe'a gunne xue chee bénnea' guca na chee', san bena' na chee gueque be'ele lau Dios ca dxele gunne xue cheentu'. <sup>13</sup>Chee le na' guca da bexúe zren na netu'.

Da naca tu da zrendxa, gubéle'entu' gate blé'entu' zúale Tito xel-la dxebe, lawe' da xúgute le'e bexúe zrenle-be'. <sup>14</sup>Láqueze bca'ana szrena' le'e lau Tito, quebe dxedu'eda', lawe' da cáteze naca da li ca naca xúgute da bchálajlena' le'e, cá'anqueze guca da li da bena' gate bca'ana szrena' le'e lau Tito. <sup>15</sup>Nazrí'idxabe' le'e gate dxajsá lázrebe' ca benle xúgute le'e, benle cáteze gunábabe' le'e, ne ca guzí' lu na'le lebe' lu dute xel-la dxexruj

lazre', ne lu xel-la dxezrebe. <sup>16</sup>Dxebeda' lawe' da dxuxrén lazre' xánnia' le'e.

### Da dxunézrujdxu du lázredxu

**8** <sup>1</sup>Na'a, bi bicha', dxaca lazra' guzenda' le'e ca ble'e lau xel-la zri'i lazre' chee Dios ne chee xúgute cue' bi chee Cristo zaj nnita' lu xezr la xu Macedonia. <sup>2</sup>Láqueze guledé' tu xel-la zi' zren gulebéle'eqezne', na' láqueze zaj nácale' benne' xache', du lazre' bulunézruje' da zaj de chee', na' belune' ca benne' gunní'a ca'. <sup>3</sup>Dxexecheba' du lazre' bulunézruje' xúgute da gulezéquene', ne da zrendxa ca da gulezéquene'. <sup>4</sup>Gulata' xuene' netu' güentu' le' lataj xelune' tu zren bénneache dxelácalene' bi bíchedxu ca' dxelexázejene'. <sup>5</sup>Belundxe' ca da guleza lázrentu', lawe' da belunna cuínaqueze', nédxula chee Xránadxu, na' gudé na' cheentu' netu', cáteze dxaca lazre' Dios. <sup>6</sup>Ca' naca na, guta' xúentu' Tito gusexuzre' gutupe' da gunézrujle le'e, da na' guzú lawe' dxutupe' gate nate. <sup>7</sup>Le'e dxúnle'ele ca naca da dxunle, ca dxeajlí lázrele Dios, ne ca dxusédele bi chee Cristo, ne ca naca da naxéajni'ile, ne ca du lázrele dxunle xúgute, ne ca nazri'ile netu'. Ca' naca na, cá'anqueze dxal-la' gúnle'ele ca gunle zrin chawe' nigá.

<sup>8</sup>Quebe dxapa' le'e da nigá ca tu da dxenná be'eda' le'e. Dxaca lazra' nézele ca du lazre' dxelún xezícadxa bénneache zrin nigá, dxulunézruje' dumí, chee gueque be'ele che naca li lazre' xel-la zri'i lazre' chee. <sup>9</sup>Ba nézquezle ca naca xel-la zri'i lazre' chee Xránadxu Jesucristo. Naque' benne' gunní'a, san ben cuine' benne' xache' lawe' da bzri'ine' le'e, chee gácale le'e benne' gunní'a lu da naca chee Cristo lawe' da gudé Le' lu xel-la xache'.

<sup>10</sup>Chee gaca da ba neza chee dxapa' le'e da dxéqueda' ca naca da nigá. Gudú iza guzú laule, quegá dxúnzele, san du lázrele dxunle da nigá, dxunézrujle dumí. <sup>11</sup>Na'a, le gúnteze na chee xexuzrte gunle na, gunle na du lázrele cáteze guzú laule dxunle nédxute, gunézrujle ca da du de chee. <sup>12</sup>Che da li dxaca lazre' tu benne' gunézruje', Dios xezaca ba lazre' na che gunézruje' ca da nape', ne quegá dxenabe' da quebe napa béne'a.

<sup>13</sup>Quebe dxennía' da nigá chee xexácale le'e xache' chee gácale' benne' xula. <sup>14</sup>Naca na chee gápale lébetē. Na'a nápale chee gunézrujle ca da dxelexazrje benne' xula ca', na' xetú lasa

xelapa benne' ca' da xelunne' chee gate bi xáxrjele le'e. Caní gápale lébete <sup>15</sup>cáteze naxúaj na lu dizra' lá'azxa, dxenná na: Bénnea' nápalé'e quebe bi begá'ana chee', na' bénnea' nape' láteze quebe bi bexáxrjene'.

### Tito ne bi ljwezre' ca'

<sup>16</sup>Xcalén Dios, Bénnea' bzue' lu lázrdau Tito sue' gunne xue chee le'e ca zua' neda'. <sup>17</sup>Guzí' lu ne'e da bsebagá' le', na' lawe' da zúaqueze' gunne xue chee le'e, ba bezé'e chee xide' xedajnné'e le'e lawe' da dxaca lázrequeze le'.

<sup>18</sup>Tu zren nen Tito nasél-lantu' tu bi bíchedxu, tu benne' dxelenné chawe' chee' xúgute cue' bi chee Cristo, ca naca zrin xrlátaje da nune' chee dizra' chawe' chee Cristo. <sup>19</sup>Quegá tuze da nigá, san xúgute cue' bi chee Cristo gulequé'e bi bíchedxu níqueze chee sálene' netu' chee gácalene' netu' lu zrin nigá da dxuntu' dxutúbentu' dumí da gácale na benne' xache' ca' chee gaca ba Xránadxu, ne chee gulé'e lau du lázrele dxunle zrin chawe' nigá. <sup>20</sup>Caní dxuntu' chee quebe nu benne' si tizre' netu' ca dxuchínentu' dumí zrente nigá da dxulunezruj bi bíchedxu ca'. <sup>21</sup>Dxuntu' ba xuzre guntu' zrin nigá lu dute xel-la li lazre' cheentu', quegá tuze lau Xránadxu, san cá'anqueze lau xúgute bènneache.

<sup>22</sup>Tu zren nen benne' caní nasél-lantu' xetú bi bíchedxu, tu benne' da zánete lasa ba blé'ene' netu' du lazre' dxune' zrin chee Cristo, na' na'a du lázredxe' dxune' zrin nigá lawe' da dxuxrén lazre' le'e. <sup>23</sup>Che nu benne' guchebe le'e ca naca chee Tito, le xe'e nácabe' bi ljwezra', ne dxunbe' zrin tu zren nen neda' chee gunbe' zrin chee. Che nu guchebe le'e ca naca chee xezícadxa bi bíchedxu ca' zeajzrague' Tito, le xe'e zaj naque' benne' gulesel-la xúgute cue' bi chee Cristo, ne dxelape' ba lá'ana Cristo. <sup>24</sup>Chee le na', chee xeleneze xúgute cue' bi chee Cristo, le gulé'e le' nazri'ile le', na' naca cheentu' xucá'ana szrentu' le'e.

### Da dxulunézruje' chee bi bíchedxu ca'

**9** <sup>1</sup>Ca naca chee dumí da gunézrujle chee bi ca' chee Cristo, quebe dxun na ba xen guzúaja' chee, <sup>2</sup>lawe' da ba nezda' ca dxaca lázrele gunle na. Dxezaca ba lazra' dxapa' bi bíchedxu zaj zre'e xezre ca' zaj nababa xezr la xu Macedonia, le'e zrale xezre ca' zaj nababa Acaya, gudú iza ba zúatequezle

bi gunézrujle, na' benne' zante benne' Macedonia du lazre' dxulunézruje' lawe' da dxunézrujle le'e du lázrele. <sup>3</sup>Dxusel-la' bi bíchedxu caní chee quebe gaca tu da wen lazre' ca da chawe' da ba gunnía' ca dxunle le'e da nigá, ne chee súatezle bi gunézrujle, ca ba gucha' benne' caní, <sup>4</sup>ne che sa'aca bal-la benne' Macedonia tu zren nen neda' chee quebe xelexé'ene' quebe zúatequezle le'e bi gunézrujle. Chela gaca na caní xedué'entu' lawe' da bxren lázrentu' le'e caní, na' da zrendxa ca dxal-la' xedué'ele le'e. <sup>5</sup>Chee le na' gúqueda' dxun na ba xen naba' bi bíchedxu ca' xelide' xedajlennabe' le'e nédxula, ne chee xelácalene' le'e gutúpale da guchebe lázrele nédxula gunézrujle. Ca' gaca na, dumí da gutúpale watá'queze na chee gulé'e na naca tu da dxaca lázrele gunle, ne quegá tu da gunne xúentu' le'e.

<sup>6</sup>Le nna'xque da nigá: Bénnea' dxaze' láteze, cá'anqueze láteze zezi'e, na' bénnea' dxázale'e, cá'anqueze xezi'ile'e. <sup>7</sup>Tu tu benne' dxal-la' gunézruje' cáteze da ba nune' lu lázrdawe', quegá ca tu benne' quebe dxezaca ba lazre', u xadíaze, lawe' da nazrí'i Dios benne' dxunézruje' dute xel-la dxebé. <sup>8</sup>Wazeque' Dios gúnnale'e le'e ca naca xúgute da chawe', chee gata' chee xúgute da nachínele, ne gápale bi gunézrujle chee gunle xúgute zrin xrlátaje. <sup>9</sup>Naxúaj lu dizra' lá'azxa da dxenná na:

Du lazre' bnézruje' chee benne' xache' ca'.

Ca zaj naca zrin xrlátaje nune' xelegá'anatequeze na.

<sup>10</sup>Dios, Bénnea' dxunézruje' bínnedu ca' da dxázadxu, ne dxunne' da dxi'aj dxágudxu, gunne' le'e xúgute da nachínele chee gázale, na' gusegule' na chee gúnnale'equeze na lina chee zrin chawe' da gunle. <sup>11</sup>Ca' gaca na, gáta'le'e chee xel-la gunní'a ca' chee séquele gunézrujle du lázrele, na' dumí na' sél-lale lu na'ntu' netu' gun na xelé bi bíchedxu ca' Dios: Xcalenu'. <sup>12</sup>Ca' naca na, gate gunézrujdxu bi bíchedxu ca' dumí nigá da gácale na le', quegá tuze dxunézrujdxu tu da dxelechínnene' san cá'anqueze dxundxu xelé'e Dios: Xcalenu'. <sup>13</sup>Xelúe lá'ane' Dios lawe' da da nigá dxunézrujle gulé'e na dxuzúale dizra' chee dizra' chawe' chee Cristo. Cá'anqueze xelúe lá'ane' Dios ne chee da gunézrujle du lázrele da gácale na le', ne xúgute cue' bi chee Cristo. <sup>14</sup>Chee le na' benne' ca' xelenabe' chee lau Dios, ne xelexé'ile'ene' le'e ne chee xel-la zri'i lazre' zren da gulé'e lau Dios ne chee le'e. <sup>15</sup>Xcalén Dios lawe' da nunne' dxi'u tu da zrente da quebe séquedxu xuzájla'adxu.

**Xel-la dxenná bea napa Pablo lawe' da naque' gubáz chee Cristo**

**10** <sup>1</sup>Neda', Pablo, dxuzenda' le'e da nigá ne chee xel-la dxexruj lazre', ne xel-la zri'i lazre' chee Cristo. Dxelenné' naca' benne' zren lazre' gate zúalena' le'e, na' gate zua' zitu' nácale'a benne' snia. <sup>2</sup>Dxata' xueda' le'e quebe gunle, gate xida' xedajnná'a le'e, gaca' benne' snia nen bal-la benne' ládujla le'e, benne' ca' dxelenné' dxuntu' zrin chee Cristo lu bela' dxenze cheentu', na' zúaqueza' tíl-laqueza' benne' ca'. <sup>3</sup>Láqueze nácantu' bela' dxen quebe dxedíl-lantu' lu bela' dxenze cheentu', <sup>4</sup>lawe' da quebe zaj naca chee bela' dxenze da dxuchímentu' lu wedil-la cheentu', san zaj napa na xel-la waca chee Dios chee séquentu' guzría xintu' da wal-la ca' chee nu na' dxedábaga' netu'. <sup>5</sup>Ca'an naca, dxuzría xintu' da dxusebaga bénnea' dxi'u, ne da dxuzúe' lu xel-la dxucá'ana szren cuina chee quebe xelúnbea bénneache Dios. Xúgute da zaj xu'u lu xichaj bénneache dxuzúantu' lu na' Cristo chee xuluzúe' dizra' chee'. <sup>6</sup>Zuátequezentu' gudentu' xel-la zi' xúgute benne' ca' quebe dxuluzúe' dizra' chee' gate na' ba dxuzúale dizra' chee' du lázrele.

<sup>7</sup>Le'e dxenna'le benne' ca' cáteze da zaj naque' cúzreze. Che nu benne' dxéquene' da li naque' bi chee Cristo, dxal-la' gueque bé'ene' cáteze na' naca le' bi chee Cristo, cá'anqueze nácantu' netu' bi chee Cristo. <sup>8</sup>Láqueze dxuchínedxeda' ca dxal-la' guna' xel-la dxenná bea cheentu', quebe dxedué'eda' lawe' da nunna Cristo netu' xel-la dxenná bea na' chee séquentu' gusegúlantu' le'e lu da naca chee Dios, ne quegá chee guzría xintu' le'e. <sup>9</sup>Quebe dxaca lazra' guéquele le'e dxaca lazra' gucheba' le'e ne chee da dxuzúaja' chee. <sup>10</sup>Dxelenné' xiche ca' da dxusél-la' zaj naca na snia, ne wal-la, san néda'queza' naca' benne' nate ni'a na', ne ca dxuchálaja' quebe zácateca. <sup>11</sup>Bénnea' dxenné' da nigá dxal-la' gueque bé'ene' cáteze naca' lu dizra' dxuzúaja' gate ne zua' zitu', cá'anqueze gaca' lu da guna' gate na' súalena' le'e.

<sup>12</sup>Quebe dxexázrentu' gutil-le lébentu', u gulé'e cuínantu' ca zaj naca bal-la benne' ca' dxulucá'ana szren cuine'. Dxelune' tu da xálaze gate dxelenné'e ca da zaj nácaqueze', ne dxulutille lebe ljwezre'. <sup>13</sup>Quebe gucá'ana szren cuínantu' lu da quebe naca cheentu'. Dios naque' Bénnea' gulé'ene' netu' naga ze lau guntu' zrin, na' Le' benne' netu' lataj blantu' naga zrale le'e lu

xezre Corinto. <sup>14</sup>Chee le na' quebe dxedxúajntu' naga ze lau cheentu', cáteze gaca na che quebe ne zrintu' naga zrale le'e nédxute. Netu' nácantu' benne' nedxu blantu' naga zrale le'e núantu' dizra' chawe' chee Cristo. <sup>15</sup>Quebe dxucá'ana szren cuínantu' lu zrin da zaj nun benne' xula, san dxebeza lázrentu' cáteze gula xel-la dxeajlí lazre' chee,le, waca gúndxantu' zrin ládujla le'e gusegúlantu' xel-la dxeajlí lazre' chee,le, san guntu' na lu'ule da naca cheentu'. <sup>16</sup>Te na' dxebeza lázrentu' tédxantu' ca naga zrale chee guzénentu' bénneache zaj zre'e ga na' dizra' chawe' chee Cristo, ne quebe chú'untu' naga ba zaj nun zrin xezícadxa benne' ca', chee quebe gucá'ana szren cuínantu' lu da ba zaj nune'.

<sup>17</sup>Che nu benne' dxaca lazre' nu gucá'ana szrene', dxal-la' gucá'ana szrene' Xránadxu. <sup>18</sup>Bénnea' dxexedxúaj xrlátaje, quebe naque' benne' dxucá'ana szren cuine', san naque' bénnea' dxucá'ana szren Xránadxu le'.

**Ca naca chee Pablo, ne benne' gubáz ca' quebe nasele-la Cristo le'**

**11** <sup>1</sup>Le guchaga lau neda' chee nnia' late' da ca zeaje na. Ajateze naca na, le guchaga lau neda', <sup>2</sup>lawe' da dxé'le'a gunne xue chee le'e lu da nusebaga Dios neda', ne lawe' da ba nachebe lazra' chee gácale zru'ula Cristo, dxaca lazra' gudéa' le'e lau Le' ca tu nu'ula cuíde'dau' du lazre' súalebe' benne' cheebe'. <sup>3</sup>Ca ben bela' gula na' guz'í xeba' Eva nen xel-la neze cheeba', dxezreba' güele lataj nu si xe le'e, na' cuásale lu xichaj lázrdaule chee québedxa gácale du lázrele chee Cristo. <sup>4</sup>Le'e dxuchaga laule benne' ca' zá'aque' dxuluchálaje' chee tu Jesús, benne' nazrá' ca Bénnea' bzénentu' le'e chee Le', ne du lázrele dxez'í' lu na'le tu be' da nazrá' ca Be' na' da ba guz'í' lu na'le, ne dxez'í' lu na'le tu dizra' da nazrá' ca naca dizra' chawe' da ba guz'í' lu na'le. <sup>5</sup>Dxéqueda' quebe zaca' neda' látezdxa ca benne' gubáz zren ca', benne' ca' zéajlele le'e. <sup>6</sup>Láqueze quebe gaca guchálaja' xrtándau', dxéajni'ida' da na' dxuchálaja' chee na, na' blé'entu' caní naca na lu xúgute da ba bentu'.

<sup>7</sup>¿Bena' tu da calela gate bzenda' le'e dizra' chawe' chee Cristo, ne quebe bi bchízruja' le'e, na' ben cuina' dxexruj lazre' chee xegá'ana szrenle le'e? <sup>8</sup>Guca na ca gudawa' dumí chee xezícadxa cue' bi chee Cristo gate guz'í'a da belunne' neda' chee bena' zrin ga zúale le'e. <sup>9</sup>Gate na' guzúale'na' le'e,



ne bxázejda', quebe bi guzí' lu na'a da naca chee, san bi bíchedxu zá'aque' xezr la xu Macedonia belunne' neda' ca da guchínneda'. Bena' ba xuzre quebe bi gunábeda' le'e, na' cá'anqueze guna'. <sup>10</sup>Lawe' da núnbe'a da li chee Cristo, quebe zua nu benne' naga nababa xezr la xu Acaya gaca guzague' neda' chee québedxa gucá'ana szren cuina' chee da nigá dxuna'. <sup>11</sup>¿Bizr chee na' dxennía' caní? ¿Naca na lawe' da quebe nazrí'ida' le'e? Nézqueze Dios nazrí'ida' le'e.

<sup>12</sup>Gúnqueza' ca dxuna' chee quebe gata' lataj chee benne' ca' dxelaca lazre' xulucá'ana szren cuine' lawe' da dxeléquene' dxelune' zrin cáteze dxuntu' netu'. <sup>13</sup>Benne' caní zaj naque' gubáz quebe nase-la Cristo. Dxelezí xē'e bēnneache, ne dxululé'e cuine' ca gubáz chee Cristo. <sup>14</sup>Quebe naca da nigá da xebánedxu lawe' da Satanásqueze dxulé'e cuina na ca tu gubáz chee xabáa zue' lu xel-la naxaní' chee Dios, <sup>15</sup>na' chee le na' dxululé'e cuine' ca benne' dxelún da xrlátaje. Benne' caní xelebía xi'e ca ba naca chee benne' dxelún da caní.

### Da guzaca Pablo lawe' da naque' gubáz chee Cristo

<sup>16</sup>Xecha lasa dxapa' le'e, quebe nu benne' dxal-la' guéquene' nadá xichaj lázrdawa'. Che ca'an dxéquele le'e, le gunna neda' lataj guchálajlena' le'e ca tu benne' nadá xichaj lázrdawe', chee gaca gucá'ana szren cuina'. <sup>17</sup>Quebe dxapa' le'e da nigá lu xel-la dxenná bea chee Xránadxu. Guchálaja' ca tu benne' nadá xichaj lázrdawe', nnia' tu da gucá'ana szren cuina'. <sup>18</sup>Lawe' da zaj zra' benne' zante dxulucá'ana szren cuine' lu da zaj naque' chee xezr la xu nigá, cá'anqueze neda' gucá'ana szren cuina'. <sup>19</sup>Lawe' da nácale'ele benne' sina dxuchaga laule du lázrele benne' zaj nadá xichaj lázrdawe'. <sup>20</sup>Dxuchaga laule benne' ca' dxelexune' le'e ca benne' zaj nada'u, ne benne' ca' dxuluchínene' le'e, ne benne' ca' dxelenná bé'ene' le'e, ne benne' ca' dxuluzúe' le'e chalá'ala, ne benne' ca' dxelegape' xraga laule. <sup>21</sup>Láqueze dxedué'eda' dxennía' da nigá, quebe guca' benne' dxechugu lazre' chee guna' ca dxelún xezícadxa benne'. Na'a gaca' lazre' dxugu guna' caní.

Ba dxelechugu lazre' benne' xezícadxa dxulucá'ana szren cuine'.

Cá'anqueze neda' xechugu lazra' guna' na, láqueze naca tu da ca zeaje da dxennía'.

<sup>22</sup>¿Zaj naque' benne' hebreo?

- Cá'anqueze neda' naca' benne' hebreo.  
 ¿Zaj naque' benne' Israel? Cá'anqueze neda'.  
 ¿Zaj naque' zri'ine zre sua Abraham? Cá'anqueze naca'  
 neda'.
- 23 ¿Zaj naque' wen zrin chee Cristo?  
 Nácadxa' neda' wen zrin chee' ca benne' ca',  
 lácala dxuchálaja' ca tu benne' nadá xichaj lázrdawe' gate  
 dxennía' da nigá.  
 Ba bendxa' zrin ca benne' ca'.  
 Ba buluzálajdxa bénneache neda' ca nu bzálaj benne' ca'.  
 Ba gulegu'udxa bénneache neda' lizre xia ca belune' chee  
 benne' ca',  
 na' zane' lásate ba guzúa' lu da stebe chee xel-la gute.
- 24 Gazzu' lasa ba belúe benne' judío ca' neda' xide chennu  
 dxua weaj.
- 25 Chunna lasa beline' neda' xaga. Tu lasa belúe neda' xiaj.  
 Chunna lasa guxaze da dxedá lawe' nísadau' da xu'a lu nisa.  
 Tu lasa, tu zra tu xela guxu'a lu nísadau'.
- 26 Zane' lásate guxu'a neza, ne guzúa' lu da stebe:  
 Chee xegu ca', ne chee gubán ca'.  
 Chee benne' waláZR chia' ca', ne chee benne' zitu' ca'.  
 Guzúa' lu da stebe lu xezre, ne le'e xixre', ne lu nísadau',  
 ne ládujla benne' wen lazre' dxelenné' zaj naque' bi  
 bíchedxu.
- 27 Benle'a zrin, ne guzúa' lu da zi' da xa'.  
 Zane' lásate quebe gusia' dxela.  
 Gudúnle'a, ne gubílele'eda', na' zane' lásate bena' gubasa.  
 Catite bexaga', ne bexáZrjeda' zra lana' gacua'.
- 28 Da zrendxa ca da caní, ne kezícadxa da guzraca'.  
 Xúgute zra dxéqueda' zi' lawe' da zua' gunne xue chee  
 xúgute cue' bi chee Cristo.
- 29 Che nu benne' nate ni'a ne'e lu xel-la dxeajlí lazre' chee',  
 cá'anqueze neda' dxéqueda' nate ni'a ná'aqueza'.  
 Che nu benne' dxelune' dxeajchaze', néda'queze dxaca'  
 tul-la.
- 30 Che dxun na ba xen gucá'ana szren cuina',  
 gucá'ana szren cuina' chee da ca' dxululé'e na nate ni'a  
 na'a.
- 31 Dios, Xra Xránadxu Jesucristo, Bénnea' naca chee' güe  
 lá'anatequezdxu Le', nézene' dxennía' da li. 32 Gate guzúa'

xezre Damasco, benne' wnná bea na' dxune' zrin chee wenná bea Aretas bzre'e benne' dxuluxúe' dxa xu'u chee xezre na', chee xelee-le' neda'. <sup>33</sup>Na' bi bíchedxu ca' bululetje' neda' tu lu xcuite xia ga dxu'u lení' chee xu'u lu ze'e da naxechaj na xezre na'. Ca' guca na, gulá' lu na' benne' ca'.

### Da ca' Dios blé'ene' Pablo

**12** <sup>1</sup>Da li quebe dxal-la' gucá'ana szren cuina', san guchálaja' chee da ca' ble'e Xránadxu neda', ne da ca' ble'eda' ca naca chee'. <sup>2</sup>Neda', ca tu benne' dxéajle chee Cristo, ba zeaj chidá' iza guché Dios neda' xabáa guxunne'. Quebe nezda' che guxá'a na' duté bela' dxen chia', u che cabí. Dios nézene'. <sup>3</sup>Nezda' néda'queza', che zua' lu bela' dxen chia', u che cabí, quebe nezda', tuze Dios nézene'. <sup>4</sup>Guché Dios neda' tu xabáa chee', naga benda' dizra' bagache da quebe naca chee bénneache xelenné' ca zaj naca na. <sup>5</sup>Waca gucá'ana szrena' tu benne' caní, san quebe gucá'ana szren cuínaqueza', che quebe naca na chee xel-la nate ni'a na' chia'. <sup>6</sup>Láqueze che gaca lazra' gucá'ana szren cuina' quebe gaca na tu da xálaze, lawe' da gaca na tu da li. Quebe guna' na chee quebe nu guéquene' nácadxa' ca da gaca lé'ene' naca', u ca da gaca xenne' da dxennía'.

<sup>7</sup>Da caní ble'e Xránadxu neda' gulaca na da xebánele'edxu, na' chee quebe gucá'ana szren cuina', guca chia' ca tu xeche' naxaze lu bela' dxen chia' da dxuchine Satanás chee guzalaj na neda'. <sup>8</sup>Chunna lasa guta' xueda' Xránadxu gucuse' da dxezaca'. <sup>9</sup>Xránadxu guzre' neda': "Xela zri'i lazre' chia' naca na duté da dxechínenu' lawe' da dxulé'edxa lau xel-la waca chia' nen benne' nate ni'a ne'e." Ca' naca, dxebeda' lawe' da nate ni'a na'a chee gulé'e lau lu bela' dxen chia' xel-la waca chee Cristo. <sup>10</sup>Chee le' na' dxebeda' ca naca xel-la nate ni'a na' chia', ne ca naca dizra' schanni' ca' dxelenná bénneache chia', ne ca naca da ca' dxexázejda', ne gate zaj nau zi' xuzre' bénneache neda', ne ca naca da ba xa' ca' da dxedéa' ne chee Cristo, lawe' da gate nátedxa ni'a na'a, dxéqueda' nácadxa' benne' wal-la.

### Pablo dxe'e gunne xue chee bi chee Cristo zaj zre'e Corinto

<sup>11</sup>Guca' ca tu benne' nadá xichaj lázrdawe' gate bca'ana szren cuina' caní, san le'e benle bēna' na. Le'e na' dxal-la'

gucá'anale neda' szren lawe' da quebe zaca' látezdxa ca benne' gubáz zren ca', benne' ca' dxéajlele, láqueze quebe bi zaca' neda'. <sup>12</sup>Zrin bēna' ládujla le'e lu dutē xel-la zren lazre' chia' ble'e na da li naca' gubáz chee Cristo ne chee da dxelunna bea na, ne xel-la waca ca' chee xabáa, ne da ca' dxexebánedxu.

<sup>13</sup>¿Dxéquele le'e nácale látezdxa blau ca xezícadxa cue' bi chee Cristo lawe' da guzí' lu na'a da belunne' chia', na' quebe guzí' lu na'a da zaj naca chee? Le gunitē lau neda' che naca tu da calela quebe bēnna' le'e lataj bi gúnnale chia'.

<sup>14</sup>Na'a ba zua' xida' xedajnná'a le'e da guxunne' lasa, ne quebe si' lu na'a da zaj naca na chee. Quebe dxexí'laja' da nápaie, san lé'eqeze, lawe' da dxal-la' xulucude xruze xrna' dumí da xulunézruje' zrí'ine', ne quegá xulucude zrí'ine' da xulunézrujbe' xra xrnabe'. <sup>15</sup>Du lazra' guchíneda' dumí chia' chee gaca chawe' chee bēnne'du xu'ule, láqueze dxéqueda' gate nazrí'idxeda' le'e, látezdxa nazri'ile le'e neda'.

<sup>16</sup>Bal-la benne', láqueze zaj nézene' quebe bi guzí' lu na'a da zaj naca na chee, dxelenné' gudēl-la' le'e lu da wēn lazre'.

<sup>17</sup>¿Guzí xē'a le'e lu na' tu benne' gusel-la' chee? <sup>18</sup>Guta' xueda' Tito xídabe' xedajnná'abe' le'e, ne gusel-la' nen lebe' xetú bi bíchedxu. ¿Guzí xē Tito le'e? ¿Quebe bentu' tuze ca bentu' ládujla le'e neda', ne Tito, na' nen tuze Be' Lá'azxa?

<sup>19</sup>Bi bicha' nazri'itē lazra', ¿dxéquele dxucá'ana cuínantu' xrlátaje laule le'e? Dxuchálajlentu' le'e lau Dios, ne lu La Xránadxu Jesucristo. Xúgute da caní dxennantu' chee gúlale lu da naca chee Dios. <sup>20</sup>Dxezreba' gate xida' xedajnná'a le'e, walé'eda' le'e quebe nácale cáteze dxaca lazra' gácale, na' le'e walé'ele neda' quebe naca' da dxaca lázrele gaca'. Dxezreba' dxedíl-lalele ljwézrele, ne nácale xa lazre', ne dxezrá'ale ljwézrele, ne nácale zide lazre', ne nácale wetupa dizra' bizruj, ne dxez'í tízrale ljwézrele, ne dxucá'ana szren cuínale, ne dxunle da calela. <sup>21</sup>Dxezreba' gate xida' xedajnná'a le'e, Dios gunē' xedué'eda' ne chee le'e, da gucuezre na neda' ne chee zánele le'e, benne' ca' dxelúntequeze' dul-la, ne quebe dxulusane' dxelune' da sban, ne da dxulucá'ana sban ljwezre', ne da calela da tu dxelúnzqueze'.

### Dizra' bzebe

**13** <sup>1</sup>Da nigá naca na da guxunne' lasa xida' xedajnná'a le'e. Xúgute dxulé'e lawe na naca na da li ne chee

dizra' chee chupa u chunna benne' xelexechebe'. <sup>2</sup>Benne' ca' belune' dul-la nédxula, ne xúgutele le'e, dxácate ne zua' zitu' naga zrale, dxuzenda' le'e da xula ca da gucha' le'e gate bedajnná'a le'e da gudxupe' lasa, che xida' xedajnná'a le'e da xula quebe gudéa' cá'aze ca da ba nunle. <sup>3</sup>Nadxa lé'ele da gulé'e na dxenné Cristo lu dxu'a neda', na' Le' quebe nate ni'a ne'e lu da gune' chee, san naque' benne' wal-la ládujla le'e. <sup>4</sup>Da li gudé'e xaga béguaj ca tu benne' nate ni'a ne'e, san naca bane' ne chee xel-la waca chee Dios. Cá'anqueze netu' nate ni'a nantu' ca da guca chee', san lawe' da nácantu' tuze nen Le' gaca bantu' ne chee xel-la waca chee Dios chee guntu' zrin chee le'e.

<sup>5</sup>Le guxúe xanne' cuínale chee gueque be'ele che da li dxeajlí lázrele Cristo. Le guxúequeze cuínale. ¿Quebe dxeque be'ele zua Jesucristo xichaj lázrdaule, che da li dxeajlí lázrele Le'? <sup>6</sup>Dxebeza lazra' gueque be'ele quebe naca' neda' benne' wen lazre' lu da naca' chee Cristo. <sup>7</sup>Dxenábantu' lau Dios chee quebe bi da calela gunle, quegá chee gulé'entu' dxennantu' da li, san chee gunle le'e da xrlátaje, láqueze dxéquele le'e quebe dxennantu' da li. <sup>8</sup>Quebe bi gaca guntu' da dxedábaga na da li, san tuze da dxácale na da li. <sup>9</sup>Chee le na' dxebentu' gate nate ni'a nantu', che le'e nácale benne' wal-la, na' nábaquezentu' Dios chee gácale duté da dxal-la' xelaca bi chee Dios.

<sup>10</sup>Dxuzúaja' chee da nigá nédxula ca xida' xedajnná'a le'e, chee quebe gun na ba xen gate xida', gácale'a benne' snia ca guchíneda' xel-la dxenná bea chia', da benna Xránadxu neda' chee séqueda' gusegula' le'e lu da naca chee Dios, ne quegá chee guzría xi'a le'e.

<sup>11</sup>Na'a, bi bicha', le sua xel-la dxebé. Le gaca duté da dxal-la' xelaca bi chee Dios. Le xue zren ljuwézrele. Le gaca tuze tule xetule, ne le sua xel-la dxebeza zri lazre', na' Dios, Bénnea' dxunne' dxi'u xel-la dxebeza zri lazre', ne nazrí'ine' dxi'u sáalene' le'e. <sup>12</sup>Le gugapa diuzre ljuwézrele tule xetule, ne le gunida ljuwézrele. <sup>13</sup>Xúgute bi bíchedxu, bi chee Cristo dxulugape' le'e diuzre.

<sup>14</sup>Dxaca lazra' gucá'ana Xránadxu Jesucristo le'e chawe', ne zri'i Dios le'e, ne sua tuze Be' Lá'azxa nen le'e. ¡Ca'an gaca na!